


辭賦詩疏啓


批判

凌虛關漫稿一



群芳譜

莊獻世子睿恭



凌虛關漫稿卷之一目錄

辭

延祥辭

丁卯

長樂辭

自警辭

己巳

菊花辭

庚午

精一齋辭

并小序
○壬申

金風辭

癸酉

凌虛亭辭

甲戌

六更辭

賦

翠雲亭賦

辛未

太極賦

壬申

羨里演易賦

丙子

八卦賦

舊邦新命賦

幽雅賦

詩

竹

丁卯

題千歲春

彼南岡三章

鳳鳴岐山一章

日出東方一章

讀書

二首

題畫圖

秋夜

春日

閒詠

戊辰

鳳

龍

虎

閒坐

紈箋

二首

贈人

二首

春祝

二首

百公字詩

端居

九日

失題

冬夜

延祥詩 已巳

元朝 二首

關王廟

寫懷長妹和平翁主

書賜洪寅昌 庚午

守禦使李宗城曾以賓僚受益甚多今往南漢
於其出也悵望如有失筵中有吟贐其行以
冀其遄返

大駕幸溫泉

夜坐

書贈朴相詰

慈殿延祥詩

二首 ○
辛未

大殿延祥詩

二首

有意作

除夜

延祥詩

三首 ○
壬申

慈殿春帖

二首

大殿春帖

二首

贊武安王

春詞

端陽

七夕

暑枕

四時景

四首

陪駕詣

永禧殿

三首

鐘閣

拜賜紅桃

弘化門祇迎

大駕

莞爾而書

題屏

八首

託意

賦夜半鐘聲到客船

細柳行

偶感

秋日

弄墨便面用前韻

詠渭水

拈陽字

麟

龜

隆中

苦肉計

太極圖兩大圈晝日夜月

夜讀錦匣書

人有示以畫者書此以助粲然

讀毛氏詩傳

疹後受賀疊前韻

二首

恭題御畫

是年九月 慈殿誕辰在晦間 聖上誕辰在

旬後元孫生於念後時以恩渥三杯酒爲題

有賦詩者余亦賦得一詩

扇題

并小序

偶作

書懷

復讀常棣章有感

晨興

燈花

癸酉

立春詩

書築壇拜將簇

少年行

詠物

燈夕

西瓜

蓮花

菊花

書贈

畫穀城黃石問納履得失於傍人

鼓琴思伯牙詠音字

聽滕王閣序漫題

心

題長坂護主圖

蠶桑織女

明月夜

翌夜又詠月

走毫蒲葵

詠懷

看宋史武穆回軍

擣衣

五首

慈殿尊號日志慶

紙鳶行

關雎詩

贈橘春坊李明煥

并小序

寫意臥遊

二首

余素不飲酒時適苑中綠陰可賞與之酒使左

右醉吟此以記其景

甲戌

走吟

三盃拔劍舞龍泉

試筆

三首

吟客遊崑崙

詠金樽

詠槐

秋聲

秋色

秋事

秋功

漫吟

唐虞舊物

重陽

戒酒漫筆

章臺柳

讀宋史 乙亥

書感明史

贊方鐵兩忠臣

贊程濟

書墨匣

題寢屏 二首

賞菊

一笑行

書與說者 丙子

贈人 四首

開字拈韻

生辰祝壽詩

○并小序
八首

汾水秋風行

秋夜月又明

寫懷

臘五

巳卯

題兵學指南

矯首遐眺

洗心臺賞春

庚辰

翠微臺濃陰

漢江泛舟

辛巳

西京贈人

戲贈坡平主人

蹕蹕九萬

凌虛閣漫稿卷之一目錄

凌虛關漫稿卷之一

辭

延祥辭

丁卯

天開兮地闢一陽一陰鼓機緘以來往歲云改兮立
春生萬物而育養協氣先兮宮柳繽枝葉兮流光蘭
出秀於庭除兮梅馥馥而芬芳楣赤符以禳災兮爆
青竹使辟瘟慶福爭湊于一堂兮喜色洩融於千門
河之清以五百兮隱士休於芝曲外公正而崇義兮
內豁然如光燭紆香菜於寶盤兮迎新年而賀祥奉
三殿而歡娛兮拊膝下而弄璋念蔀屋之窮民兮其

於食息而豈暫忘

長樂辭

我 慈聖之壽考兮允吾 王之至孝儀長樂而歡
娛兮憬而訓與而教蓋 聖德如昔周之太任兮恩
已覃乎八域之蒼生和氣融於殿裏兮彌軒紀於堯
冀顧小子區區之顙祝兮 寶筭之高而 玉體之
安如岡陵之不崩兮如河海之不乾桴五龜而戴獻
南山兮駕六龍而含輸瑞珍惠風吹於柳枝兮王春
爲首而麗景新列椒花而柏葉兮匝歌頌而洋洋奉
玉觴而稱慶兮億萬年之无疆

自警辭已巳

紀綱樹兮明賞罰賞罰明兮國治治國家兮百姓安
大公正兮無私無私兮體天道體天道兮祇台

菊花辭庚午

秋風颯兮露結籠萬樹兮交紅鴈南飛兮蘆績鷺北
歸兮稻功鞠有華兮正中按月兮時嬪儀原餐兮
賦騷慕陶掬兮詩箋帶金色兮靚容凌霜氣兮姱節
充寒操兮徇義葆晚香兮流潔花寒芳兮葉萎蜂蝶
歸兮閒閒朝霞濕兮東籬暮雲逗兮南山飄鶴翎兮
禁苑醉楊妃兮沉香紛通州兮玉臺與墨蘂兮爭光

雪白魁兮下輦烏紅殿兮銀黃

鶴翎禁苑醉楊妃通
州紅玉臺黃墨藥雪

白下輦烏紅銀
黃皆菊名也

美仙潭兮恬如吸一椀猶齡長濂愛

蓮兮猷筠媿君子兮貞士雒之陽兮羣芳敢暨斯兮

均視穠華冉兮著詩果之珍兮桃李筮黃裳兮元吉

垂嘉名兮花史

精一齋辭

并小序
○壬申

取精一齋精一二字之意而作

集福之西北養和之正東有一小齋名曰精一庸述

一語以表齋名之所以作其辭曰

大哉齋名肇於書經聖謨孔彰炳若丹青何以謂精

何以謂一擇焉則精執之曰一故精一執中堯舜禹
之授受建中建極湯文武之旨訣且人心危何察乎
其隱密道心微何守乎其省察惟精而察惟一而守
然則精乃擇善一乃固守是以精未可以捨一一然
後而執中墨卿識哉至正大中

金風辭

癸酉

金風颯而淅瀝兮木堅固而剛剛伐青岡之斑竹兮
鍊金鐵而鸞篁美靈樹之屈曲兮似雲龍之吐霧顛
后皇之嘉種兮龍一吟而風雨觀黝雲之騰騰兮未
能見夫真龍槐引飆而納涼兮肆莞簟而穹窿談千

古之理亂兮神鬼爲之徘徊
津澁澁而滿襟兮直千金而易來
好丙丁而在側兮夏日熱而未已
瀉銀河而大笑兮仰青天而呵呵
儵投筆而起身兮窄窄乎東海之東
續大笑而復瀉兮傳萬世之無窮

凌虛亭辭

甲戌

時當孟冬日到中旬白雪翩而如席
松竹青而嶙嶙重裘煖而博山寒襲
襲而尚侵整余冠而起身緩節行夫
禁林偶爾屆於小亭名曰凌虛飄然有大人之想
頰六合以魚魚坐高堂而軒敞驅萬壑於眼底
鶴高唳而風來鴈羣飛而雲舉延眺遠野田疇
茂荒俯

瞰峙壁草樹交張爇檀香而耿滌弄玄琴而和詩東
略扶桑西顧咸池普賢鎮後木覓在前紛龍拏而虎
攫兮有如英雄之矯騫旣雍和而肅明兮鬱鬱蒼蒼
者其維太平之氣於焉詩興猶高弄筆青天之紙

六更辭

時二六而更五兮自古昔而不忒分時刻而協中兮
詎毫釐之盈縮吁唐玄之淫蠱兮詔挈壺使爲六幸
玉環之同夢兮擲廣衾於花萼白日晃於碧空兮六
宮胡爲黑夜嗟銅漏之司永兮奈蕭牆之釀禍酗于
酒而色荒兮反毛詩之何其拚乾道之夕惕兮曠帝

舜之萬幾嗤夏禹之孜孜兮倣丹朱之頡頏宣一德
而興基兮樂盤游則喪國寵胡臭之汙穢兮狐綏綏
而鶉奔畱後辟之烱鑑兮摹畫圖以傳神

賦

翠雲亭賦

辛未

園中有閒亭名曰翠雲祥暉郁郁瑞靄芬芬東撫駱
岫西挾白岳南望清廟肅雍且穆北顧紫籟松柏蒼
蔚御春風而融融兮依欄干而歌詩桃含紅於鳳砌
柳拂青於龍池日居月諸忽焉朱夏薰颿習習綠陰
亞亞清蟬嘒於葉裏黃鳥戾於花間詠南薰兮歌二

南神氣靜兮心意閒羣鴈南歸而愀縮兮金氣颯颯
而蟋蟀鳴楓磊磊兮罨紅菊冉冉兮垂黃六花按節
時則三冬寒茸裘而禦寒熾獸炭兮春烘拊萬峰之
玉立兮挹千章之喬松且序屬伏臘包馘于斯有穀
如坻有酒如溜學士授簡膳夫進俎無已太康隰榆
山杻夜如何其有煌啓明八窓根窟潛心羲經美乎
哉雖云小亭其四時朝暮之景則不可勝記故我述
其槩庸眎無止

太極賦

壬申

无極而太極兮在陰陽而是謂涵動靜而殊實兮猗

造化之樞紐萬物莫逃乎範圍之中兮庶品咸受於
方圓之形一生二而三四兮極生儀而才象成五生
八而卅六兮五行兼以八卦馬受陽而牛陰兮理與
氣而交會真凝精而妙合兮化生生兮不窮按經緯
以錯綜兮日在西而月東人獨稟乎其全兮男乾三
而女坤奇數屬夫男子兮耦則繫乎婦人抑陰氣而
扶陽兮亙千古而理明繫剛健而純粹兮旁六爻以
通情一六水之居一兮人始生而先貌火居二而木
三兮次呼母而能視四九金而五土兮漸聽語而志
立理无始而无終兮實總歸乎一極

姜里演易賦

丙子

國以諫臣而爲根兮聖狂明昏由是以判納拒差之
毫釐兮塵露漸漸乎浩瀚嗟三侯之匡紂兮二受戕
而一廢姬姜里而知藏兮窮包犧之玄理積德胚於
公劉兮夫何泯而不揚繩先祖之不緒兮念王室而
含章薄言愬而逢彼怒兮胡一時而忘怨分八八而
贊辭兮配奇耦而玄圈准萬物之成數兮測日月之
盈虧嗟烝黎而曷辜兮長愀恤乎仇離惡讒夫之盈
廷兮悵時俗之靡道機好戎而奄收兮是蜚于之罷
寔謬誰任以諤諤兮澤云邈乎六七噫鹿臺之竦聳

兮塗下民之膏血箕明夷而艱貞兮予外內而柔文
鞠暎衷而敷衽兮彼何人也狺狺懷幽贊而玩蹟兮
筮張皇子冥眇儀圖畫而上下兮策龍馬於玄黃之
妙彝千古而不祧兮景丕顯之令德三之二猶事紂
兮卓厥心之翼翼

八卦賦

天覆地載品物咸亨春夏秋冬元亨利貞一極生儀
儀生四象四加乎八八卦是做今我不言疇括心志
系之以辭用寫其槩天雨潤之地承含弘水火既濟
雷風是恆山澤通氣乾坤理定是以天開闢而肇判

兮一生水而海廣山海通而融結兮升有木而漸永
木燧火而爨食兮火炎炎而居丙地能厚而載物兮
資五行而築居畫日月於衣裳兮濟衆生於舟車美
矣乎天根月窟之循環而往復兮夫與剝互而扶陽
抑陰雲裏帝闕六龍駕臨君唱臣和春生萬彙君子
遜亂世而謙慎兮小人蠱損下而夫已女后當權其
政戎戎良臣遇巷其國隆隆調和鼎鼐求治莫如賢
相兮誠感于天湯文三聘伊呂備物成器誠不以天
下奉一人兮節用愛人乃堯舜禹湯化被黎庶兩人
分金而知管鮑之情兮二女同居而終生乎家亂蓋

如履虎尾卽謹慎之故兮鶴鳴子和物有感者吹萬
但思一極之理兮其千思萬行摠以歸于太極居則
觀其象而動則玩其辭兮其靜也翕而其動也闢天
地之大德曰生兮所以守位者仁歸以檢乎神化兮
渾然三十六宮都是春

舊邦新命賦

王跡肇於岐邇兮氏中葉以炳德媿西伯之穆穆兮
考歷年而八百邦之舊而命新兮象謨烈于雅什令
疊疊而貊音兮於緝熙而翼翼誕先登于彼岸兮猗
天命之授真瓜繇繇乎臚原兮四海一于歸仁聘後

車而卜獵兮御舟梁於洽陽正家始於關雎兮化之
覃兮八方經臺沼而曰靈兮澤猶淪於枯骨繼包犧
而演理兮八卦列而貞蹟續疏附而先後兮虞芮爲
之偕好子有發而無憂兮寔翦毫而代暴駕四牡而
會孟兮師尚父之鷹揚三千博於萬衆兮寬以濟夫
強剛胙茅煌而建侯兮馬牛歸於山林耆丕顯而不
承兮蔽一言曰仁心自郤室而組紺兮新孔嘉於文
王積慶由於公季兮膺曆服而於皇登周詩而耿暉
兮傳萬世而芬芳至于宣而中興兮江漢揚靈而再

昌

豳雅賦

國本兮黔首民以食而爲天體羲卦之畫豫昉戴經
之祈年斗杓斡兮太歲履畎畝而播穀春載陽兮柔
桑遵微道而葉葉秋之仲兮我朱羌載績而孔陽奉
公子兮衣冠遠父母而悲傷春之野兮冬田攻余車
而于貉取赤狐兮黃貍爛儀章兮羔飾豨以公兮縱
私誦伐檀兮河濬蟋蟀入兮床下嗟我婦兮何辰斷
青壺兮東園收黃瓜於西藉釀新麥兮綠醪介眉壽
兮千億時九月兮築場峙廩倉而迺積慶我稼之旣
同夜則絢而朝茅賽羔韭兮社神壤春牛於東郊魚

羊臙兮醜酒躋公堂而獻格稱萬壽兮无疆德布均
於疆域原蒼籙之悠久其有基乎稼穡登寶瑟兮瞽
誦念在茲而夕惕警其亡兮苞桑厲无咎而曰勗子
能和兮鶴唳誠可透乎金石對玉食兮停筯嗟我民
之膏血宅九重之華闕飫八珍之水陸本自出於窮
蔀奈之何而不節猗孔論之孔昭使以時而民役寫
其槩兮自警祗願待乎後識

詩

竹

丁卯

落落者維竹婉婉者維柳不願飄絮黏新泥可愛碧

笋生畫牖畫牖之東森似束籜龍風雨聲蕭蕭風開
雨霽春月朗影入紗窓枝枝交琅玕練實來鳳凰雅
韻依然聞舜箭安得人中如此君披拂肅肅登王朝
題千歲春

世人孰不千歲希人生七十古來稀神仙亦有皓髮
翁茂陵天子堪一唏唐家丹藥太恍惚我欲八極斤
以揮蒼松不老千歲春願進 楓陛及 萱闈松下
芝草生紫光巖上松根青苔肥千歲千歲又千歲三
千歲長老萊衣

彼南岡

彼南岡矣有苑其松黃鳥于飛其鳴噤噤原隰有條
黃鳥于飛矣于飛于飛不盈步矣盤桓于上呼羣于
下矣之子之子感時物亦有所思矣喈喈其聲翼翼
其羽矣終日于飛于其上下矣

彼南岡矣有噤黃鳥矣爲羣于飛其羣則戾雲表矣
吁嗟乎黃鳥我何從矣足其蹇矣時不利矣

彼南岡矣百草茂矣何爲而茂何爲而枯矣喬木枯
矣新草茂矣云胡一草標其異矣

彼南岡三章

鳳鳴岐山

天降休命維周是昌祇敬厥德萬國咸康咸康而又
文王懋厥德懋其德矣宜其多福彼南山陽鳳鳴于
桐矣鳳鳴于桐矣維周是宗

鳳鳴岐山一章

日出東方

日出東方四海光明君道儀之化被蒼生何以莅民
曰敬曰誠兢兢業業毋怠毋荒疇或不知鮮能力行
文勝則史罔害德性

日出東方一章

讀書

昔聞閔子騫能孝於其親不違父母志難報劬勞恩
其二

樂善堂前小雨晴朗然清夜讀書聲龍樓喜色爭先
仰昨日書筵誦一經

題畫圖

兩岸漁家夕照天蓼花不動白鷗眠此翁取適何時
返垂竹秋江日渺然

秋夜

金風蕭颯晚涼新秋夜書燈正可親經史伊吾勤日
夕漫應詩語却非真

春日

春日氣氤氳滿苑桃花發緩步心自閒花濃春雨濕

閒詠

戊辰

黃鳥在高柳清音正可憐彈琴和古什閒坐玉欄邊

鳳

九苞身在丙丁位五彩文章耀世光碧竹離離滄海
遠岐山何處有朝陽

龍

神龍豈是池中物一蹕雲霄奮赤鱗九五在天天不
遠正中陽德仰君真

虎

劔尾銅頭孰與當
虎雖陰物配純陽
百獸無聲爭懾
伏從今封爾鎮山王

閒坐

新月初生內苑時
千林螢火敢羣飛
障來百水同歸
海絲絡星辰拱紫微

紈箒

清風手可呼團月
體相似開闔隨方
便烘炎不敢抵
其二

巽宮風自掌中來
用捨依然君子節
高閣任他開卷

舒仰看青天一輪月

贈人

鳳鳴文王世麟出夫子時龍興雲雨下虎嘯冽風吹
其二

文藻繞江山青天五老筆風雲自有時穆穆明良匹
春祝

新年何所祝學問日知新悟是知非日修身正萬民
其二

勤學務誠敬恃工莫恃才光陰若流水時不再回來
百公字詩

義利關頭私與公已私自是易勝公我書公字仍成
數天理純然一箇公

端居

端居夜未艾對燭讀經書勤勤須勉學日月豈歸虛
九日

九日天氣涼菊花正芬芳草木皆黃落愛爾凌風霜
失題

以貌取人人不得荆山石裏藏真玉平原之客三千
人孰似毛生形醜惡

冬夜

慈烏向月兩三語冬夜遲遲正未眠繡幕千重寒不
襲枕邊黃橘自生香

延祥詩

已巳

百昌咸賴化工均正是春王正月春地脉初融東作
日厦氈綸綉首勤民

元朝

堯曆仰時授湯盤誦日新寶閣籠和氣君王正撫辰
其二

惠風動一夜今日是元春物物皆生意庭梅漸看新

關王廟

忠義亙千古洪恩壬癸年東南廟宇在大節至今傳

寫懷長妹和平翁主

常棣之華華重重華葉紅鮮春意中原有脊令間幾
許况也永嘆熱心衷我本同胞只數妹鴈行那知涑
水娛一自戊辰尙右感奄及今日真嗚呼先兄顏色
我不知此懷誰解愴且悲曉鼓鼙鼙眠未著刁斗之
聲又胡爲紫衣傳道須先問沁水樓臺睠言時芒乎
儵乎廿五夜要寬母意抑心嘻九重憂疾乘輿出羽
旄翩翩大寺道根天之孝病未斲回語中堂勤灑掃
夢嚙先問 聖體勞或喜或悲心未定憔悴容顏不

復春玉淚浹腮河海罄人人孰無兄及弟此時此懷
向誰告北園深松月微光恠底東峯鳥夜噪羽翼折
矣安所飛嗟嗟黃鳥誰百身鴈序漸稀三復雅連枝
蕭瑟愁思臻夢如疑真真疑夢常棣春色懷一切結
懷忍悲徒日月日月無情如水決

書賜洪寅昌

庚午

濃濃山水景移却一團中用捨有時節依然君子風
守禦使李宗城曾以賓僚受益甚多今往南漢
於其出也悵望如有失筵中有吟贐其行以冀
其遄返

講席相知八九年
懃懃誠意自油然
古人詩句偏相
感他日重逢是別筵

大駕幸溫泉

溫幸于今欲浹旬
憧憧一念何由息
回鑿知隔兩三
宵躬未恭將心抑塞

夜坐

夜氣清明獨自持
絲毫鄙吝何曾入
平時儻似此宵
心堯舜相傳心有法

書贈朴相喆

爾年十四詎云幼
來歲居然志學年
道在六經曾不

遠聖謨其敢不銘鐫

慈殿延祥詩

辛未

三陽已回泰瑞靄繞殿東

寶筭岡陵躋歡聲八域

同

其二

蒼杓轉北陸紫閣生和風

聖壽如東海海東長樂

宮

大殿延祥詩

天地渾和氣氤氲元月春

聖人敷德化賀語八方

新

其二 傲陽關

春風吹御柳和氣屬三陽
千官賀玉闕椒柏生馨香
有意作

天休積善家福祿從賢人
賢人與善家都是一團仁
除夜

冬夜餞迎好看書卽聖賢
所重民天在惟希大有年

延祥詩 壬申

赤符門虎此高堂
新菜登盤自春光
天地交和新氣
象仁風一夜及人長

其二

迓歲千門景色新
椒花柏葉一般伸
穉兒問字仍書
帖堂上雙親萬萬春

其三

和氣融融世太平
一人有慶萬方貞
含飴長樂頻供
笑犀角豐盈繞膝行

慈殿春帖

三陽開泰又年新
喜色歡聲繞紫宸
洞闢重門簪珮
響九重春意正氤氲

其二

龍池細柳入春先
朝日千官獻壽箋
寶筭可齊王

母歲阿孫賀語樂新年

大殿春帖

六陰經過一陽迴瑞色葱蘢萬戶開分付九龍東海
上頭邊爭戴屋籌來

其二

如天大德屬春元元日迎春賀 至尊八域爭歌堯
舜盛聖功神化配乾坤

贊武安王

忠義得之天賦洪粵昔武安神豪雄斬馬桃園血相
視手除黃巾樹膚公東京窄窄羣小橫壯志磊落空

歲月性喜春秋左氏傳指揮青龍刀如雪奮出千里
誅華雄十八陣侯皆驚歎綠袍金甲映日輝銀鎧橫
掛繡靴貫光燭達朝質穹蒼紅篆印書非我心軒然
赤兔掣流電肯受曹瞞遺黃金層雲一封瀉血腔白
日尋兄鞏洛外五關斬將如草芥江漢前路神先會
汝南門前月輝輝華容道上雨蒼蒼輕裝護行周郎
驚單刀赴會魯生惶荆門秋色爭義氣瞋目如無碧
眼虜志士扼腕壯夫涕風雲動盪神鬼怒龍蛇蠻祲
顯聖日拱衛鯨域山河壯拍案大叫青史中一食一
息誰能忘

春詞

十二玉欄檻紅梅冉冉香梅花爭六出忽已報春光

端陽

威鳳元來百鳥王世謂金雞備五德鳳入雞羣長羣
雞恰似千官朝玉闕

七夕

七夕人稱道德臘梧桐秋雨一回新河橋烏鵲真虛
事綵縷宮娥乞巧辰

暑枕

逐盡熇炎節蓐收披襟碧竹殿東頭驅除酷吏多風

力斗轉西方火始流

四時景

春日
上南陌弱柳弄輕烟
宮鶯嬌欲語燕舞到簷前

其二

綠陰秀且幽
炎風吹竹林佳景問如何
騷客興轉深

其三

鴈飛江南遠
黃花欲吐芳涼風吹羅衣
秋月生輝光

其四

雪花正紛紛
臘梅香馥馥高閣誰家子
剔燈看周易

陪 駕詣 永禧殿

肅肅寢門瑞色長
南山松柏映蒼蒼
堯天舜日重瞻
地萬世隆基鞏漢陽

其二

萬里秋天澄似鏡
纖塵不動御香來
欲知神鼇勤
扶護木嶽之南漢水迴

其三

天風肅齋殿
黼座儼黃收
星月垂仙綴
璫雲在上頭

鐘閣

雲從高閣大街前
萬石鐘聲夜夜傳
四達五通無少

礙豁然還似我心然

拜賜紅桃

擎出紅桃箇箇春一嘗三拜感
天恩瑤池舊種曾
千歲康色受來及此身

弘化門祇迎 大駕

龍旂直御街鸞吹擁金輦
髻白迎鑾言爭呈萬歲巘
莞爾而書

風動水如鏡青松欲夕陽
片舟依岸繫童子歌滄浪
題屏

十里平江一色連滿山松柏欲青烟
夕陽清樾依依

近指點幽居若箇邊

右禮安陶山書院

月波亭上春雲多月波亭下春水淺春水浩渺何處

山紫泉月色正爛爛

紫泉臺名
在洛東

右善山月波亭

竹林高出古城樓樓外春江十里洲太守公餘携酒
倚可能分得九重憂

右密陽嶺南樓

晉陽節度臨江樓蕩滸江聲掀蠹石莫說龍蛇雲水
同斜陽一抹牧兒筵

右晉州矗石樓

青山千疊鎖雲烟
別有招提綠樹邊
小屋清溪何郡
客一般詩思杏花天

右南海錦山

高峰挺出佛菴前
步障烟霞十里連
花際子規春月
夜倚樓歸客欲無眠

右河東佛日庵

孤雲學士渺難攀
海印高臺第一山
試向武陵橋上

望紅流洞水欲潺湲

孤雲卽崔致遠
寺有讀書處

右陝川海印寺學士臺

澄江一道古城前臺出澄江萬疊烟賴有盤龜名小
縣蓮花十丈畫圖傳

右彥陽盤龜臺

託意

駕鶴仙人鬢髮青鮫綃障子寫黃庭步虛中曲流雲
外一泛滄浪禦五靈

賦夜半鐘聲到客船

移舟泊岸樹月隱姑蘇城帶月舟中夢寒鐘隔樹鳴
細柳行

中華外夷似陰陽夷居四界爲要荒粵昔秦皇攘四

夷萬里長城沙漠鄉
鴈門烽火照甘泉
帝赫斯怒親御戎
龍旗豹節細柳營
赤羽輝熒清渭東
謀士如雲關殺關
健兒從風空朔方
大鼓一聲肅萬馬
帥字黃旗何悠揚
帝念士夫征戰苦
酒江肉陵勞三軍
平明鑾駕路青繩
帝曰開營前茅羣
前茅將士聽上壇
上壇令嚴如秋霜
按轡徐徐招搖影
將軍高揖金鞭長
羽林不語期門靜
萬乘天子誰知尊
所以吳楚七國戰
軍雄可讎北海鯤

偶感

鴻鵠順風圖萬里
可憐斥鷃搶榆地
儻無伊傅後來

功釣水築巖何所爲

秋日

萬里秋天澄似水
點無雲氣金風來
爽然豁達吾心事
試看曾中一鑑開

弄墨便面用前韻

白籬紅木淡烟收
村逕紆回亂石頭
老子騎驢何處向
清江一道向東流

詠渭水

依依綠樹多村巷
皆春色人影帶斜陽
遙看渭水白

拈陽字

雲捲長空水滿塘
簾端鸚鵡語春光
春光多在蒼龍
闕萬紫千紅
揔向陽

麟

麕身馬足尾如牛
賢聖之時一出遊
向使出遊遲又
久十年尚可繫
春秋

龜

背畫九宮任自然
著靈蒼水簡書前
圓星方土推箕
範至理無窮萬世傳

隆中

行行春雪到隆中
魚水風雲際會融
壁上朦朧荆益

畫一場閒話醉英雄

苦肉計

舳艫龍驤赤壁東水中飛火動雲虹北人頓足南人笑誰識星壇有臥龍

太極圖兩大圈晝日夜月

中秋新月十分圓萬國同看一色天消息盈虛皆有理自來太極圈中懸

夜讀錦匣書

空外如聞士馬聲始知方夜讀書情長空月色明千載人事還從醉裏更

人有示以畫者書此以助粲然

有身斯有宅上自帝王下烝庶文王之囿七十里樵
採獵牧咸歸去龍眠老師太生黠漢家宮闕來眼前
楊柳拂烟凡幾株桃花李花春色妍曳綈宮娥三五
羣長絲高繫踏濛濛紅粉粧成映日輝莫把春心綵
絲動下方珠翠嬌不勝芙蓉金塘兩行玉金觴初醉
渥洼翻建章新月歌曲潔鳳釵半斜橫紫羅綵鞠呈
戲翠微榭借問神功在何處從他紅褶金蓮下三千
粉黛似花林六宮和氣凝紫闕千古興亡水東去聲
色遊畋誰省括澹然一鑑方寸澄冰心可讎松與柏

二字操存千聖寶莫使猿馬流水決

讀毛氏詩傳

時夜堂堂玉漏傳一天明月八窓前毛詩三百能余
起看到蟲魚草木箋

疹後受賀疊前韻

百年稀慶此遭逢就日歌謠匝海東九闕洞開重
象氤氲和氣一堂中

其二

三百年來一二逢極南貞曜耀天東九重幾日惟憂
切有喜天顏此夜中

恭題 御畫

粲然花墨動雲紙農士工商各有技九幅畫圖省識
時恭知 聖上爲民志

是年九月 慈殿誕辰在晦間 聖上誕辰在
旬後元孫生於念後時以恩渥三杯酒爲題有
賦詩者余亦賦得一詩

三慶同於一月逢 皇天祖宗眷吾東此時贈酒稀
今古漾得恩波薄海中

扇題

并小序

得之壬申姤月而重陽越翼月五日題

金雞齊唱東方明老鶴一鳴能感物我賦玄機揮灑
空更看風雨龍藏窟

偶作

中原消息問如何萬里江山一醉過大義陽秋今不
講願生真主作官家

書懷

鴻鴈行疎一字斜秋風起處更堪嗟滿庭明月徘徊
夜恨入平陽大主家

復讀常棣章有感

不忍復看常棣詩如看常棣滿心悲心之悲矣憑誰

說萬緒千端未解時

晨興

清晨開著九重門
萬里天無一點雲
多事世人工覘
我須於此日仰天文

燈花

癸酉

今夜紅燈樂事占
繁花幾朶耀堂簷
陰晴休咎何須
問一理昭然座上籤

立春詩

臨去泰至三陽通
朱門碧窓紫霞濛
梅發柳舒新氣
色網縕澹宕六六宮
爆竹庭前驅儼羣
斗樞初轉春

色迴金雞高唱來歲德雄虎長鎮去年災鬱壘屠蘇
傳古事殿閣帖子詩延祥書齋庖人獻瑤觴翠柏紅
椒千條香瑤觴椒柏爛如雲白玉青絲來御園畫屏
雲簾金步搖昭容剪出迎春幡東君按節元春好河
朔轟飲賀新年但願書齋廉貞翁肯羨長安遊俠人
輕裘肥馬識者鄙歷落靈臺如水云案上香爐爐外
書孔門大路是格言

書築壇拜將簇

金壇高與蜀山嶙仗劍男兒西出秦寄語兵仙休自
大元功何似董公倫

少年行

長安俠客多少年白馬春風長安道人生百年如過
隙可笑雞冠徒虛老生來十八二十秋遊俠長安春
色早暮醉杜陵無限酒繡幕金屏鳥聲惱不曾連騎
干卿相珊瑚寶劍空自好正如辭韞之隼鷹又如脫
鬣之騾褭打鼓吹簫出洞房黃金古臺生秋草俄看
紫髯忽如絲風送鴻鴈雲外矯人間萬事如鴻濛洞
庭君山目渺渺君不見漢武英雄感畫仙仙藥有無
蓬萊島

詠物

若而身似穿山甲一任輕鳧與老獠萬甲藏胷無小
大于思蟠腹笑華元

燈夕

八日良宵喜放晴懸燈爭較月星明六龍鱗甲皆含
火萬樹芳香摠發英物態宜無前歲異人情莫謾此
時更太平千歲當中字拜向 龍樓深處呈

西瓜

西國嘉瓜一色圓清甘勝似菊花泉丹心每向君門
獻擎出宮盤學士傳

蓮花

萬朶藕花澹染紅雲霞帳裏聞香風花香霽月清無限疑是重逢太極翁

菊花

氣象依然君子節中央正色稟黃裳平生所愛惟君子蘭竹梅松各一行

書贈

進用戒輕囂安行道自饒霜臺已虛席非久帶金貂
畫穀城黃石問納履得失於傍人

五世相韓欲報恩圮橋曉月授書辰穀城黃石長隣
近楚女笙簫閱萬春

鼓琴思伯牙詠音字

海山秋色整危襟
心上嘉朋膝上琴
妙在無言言在
指知心人是我知音

聽滕王閣序漫題

滕王亭子秋江曲
有美文章前後列
隨意王生風送
帆珠簾畫棟至今說

心

心猿意馬苦難禁
清野塞旗敵不侵
古鏡重磨元有
術百回莊誦敬齋箴

題長坂護主圖

風雨襄陽百里開梨花秋氣擁城來常山陣勢渾如
此虎擲龍驤一試回

蠶桑織女

南國蠶桑勤女紅終年組織誰能服彤庭簇簇如山
堆皆出杼燈小蔀屋

明月夜

萬動無聲五夜中一輪明月掛秋空清光萬里人皆
仰豪髮絲銖入鑑公

翌夜又詠月

影入山河千萬曲九重夜夜光明燭列宿羅天如散

珠彩雲一朵華蓋覆

走毫蒲葵

毫端六合如旋蓬淋漓山水丹青中山木立靜風自
起封姨歛手無全功腕搖五嶽蒼蒼近走壁奔坂縱
橫舉秋水有聲大同殿十里平江瀉如許放馬閒人
心亦閒何時韉馬遊長安萬理森森根動靜卷舒由
來自無端

詠懷

萬事如環一夢更幽懷悄悄又三庚蒼蒼松柏翳長
道呦呦鹿鳴食野苹空言無補竟何益我年十九難

爲情風掀庭樹聲瑟瑟此聲何聲秋雨聲月如半璧
取次圓光陰一去無暫停羅衣已換皂綃裳昨夜鴻
鴈催霜征君不見滄波東流不再迴秉燭昏衢勤有
生少壯幾何老將至夫子生年書前楹

看宋史武穆回軍

昔有志士心不更腔血一斗秋崢嶸有宋武穆忠勇
士憂國愛君天高擎大破兀朮淮上軍朔北胡酋心
膽驚東窓偃月欲掩人歆血銅盤夷夏盟一日儻遲
金字牌鐘簾何須移舊京十里荷香三秋桂五國安
在嗟父兄邊門虛送半臂書東海無心魯連生嗟乎

武穆莫須有恨不將秦檜破肚斫頸臨安城

擣衣

秋風一夜動梧霜夜漏沉沉如許長擣練家家爭月
出送君鳧鴈幾翱翔

其二

天氣清明肅夜霜家家砧杵引風長征夫萬里關山
路欲寄春衣北鴈翔

其三

萬家門巷月如霜多少寒砧較夜長秀菊崇蘭秋色
外任他莊夢化蝶翔

其四

晝夜均平近雨霜向南鴻鴈入天長長安萬戶擣衣響散逐西風欲遠翔

其五

庭樹蒼蒼夜有霜千門月下擣衣長黃雲四野如金嫩米價長安不高翔

慈殿尊號日志慶

天晴日朗東朝筵顯冊揚名歡忭極頒赦域中烝庶欣微臣更祝壽千億

紙鳶行

土牛木雞傳奇聞楊柳春光何氤氳瑞色葱蘢書齋
南朝日暉暉鳥雀喧螢蟲餘跡吐綸絲內圓外方羅
倫紙楮收擣練雪光白看取法象乾元以遙遙羊角
上碧霄碧霄空闊來新月初如葉公飛雙鳧更似西
湖放白鶴鳶飛戾天天機活使我見之一嘆息坳堂
芥舟徒爾爾至理猶存遊戲物放而彌之六合外楚
水秦山如咫尺舒縮進退皆造化一絲引風風易力
人心逐物星輪轉雲外飄揚那可論兩儀八卦森萬
象河澄玉潔尋真源

關雎詩

君不見文王至德徧四荒民物熙熙如春陽分三緒
業羲經傳精一心法虞書詳鳳鳥覽輝千仞下南宮
散宜皆紀綱窈窕淑女女中聖琮璜茂實玄功揚鐘
鼓皐皐琴瑟語六宮和氣春洋洋文定厥祥嗣徽音
京室先喜媚尊章乾坤以後首咸恆帝乙歸妹卜云
臧造端蓋自舟梁日室家君王朱芾煌關雎在洲鳴
聲和覃葛施谷絲衣芳仁聞藹然被江漢鵲巢小星
歌正長上繩太任組紉懿身教以之授邑姜陰化配
健而元吉是以周道熾而昌周道熾昌八百年積德
垂慶何茫茫德之純矣刑于寡至于家邦邁虞唐中

壺脫簪承餘烈燕翼詒謨斯煌煌周官制度由關雎
蒼籙縣縣休無疆

贈橘春坊李明煥

并小序

癸酉嘉平壬寅天新雪李明煥以司書直春
坊召講于德成閣盛橘餉盤以贈之走書五
絕于盤心明煥噉橘又懷橘起而拜曰今見
祖宗盛事余曰卽前席賡韻明煥抽管將書
余令復噉一二橘明煥立取橘一盡一半遂
書和章而大讀因擎盤歸院其翼癸卯輔德
沈墜請藏盤于院中余不許明煥願作家藏

余乃笑而許之曰復有所述乎明煥曰唯仍
一誦一拜以爲欽

團團三寸黃箇箇盤中金講罷贈君嘗莫辭一句吟
上下內句同押一韻如外句上下者余所創爲也
後之覽此者不余怪也未洗馬吳載純與筵同和
此韻

寫意臥遊

山回疊疊水淒淒蒼石粼粼碧樹齊夜夜東林明月
下堪憐蜀魄盡情啼

其二

枕邊日夜大江聲
堂上楓楠四壁明
一面松林樵路
外暮雲透出寺鐘鳴

余素不飲酒時適苑中綠陰可賞與之酒使左

右醉吟此以記其景

甲戌

重重碧樹晚依依
噓送清風薜荔衣
金罍滿斟紅露
濕玉階高出彩雲飛
翠微影外春山靜
黃鳥聲中午漏稀
安得萬千嘉木蔭
長他輕嫩與芳菲

走吟

淵淵獸闥文武帳
鬱鬱煩襟何由暢
大風一闕盪心
胷萬丈光燄雲霄壯
還笑黃鵠垂劍翼
更歌瓠子秋

水章北溟鯤化大鵬飛一氣直到蒼茫鄉四海八荒
動超忽蓋地風翩翩然長俯瞰齊州九點烟醯雞小
甕蠻觸場指彈崑崙如小垤足蹴滄渤如曲池雲龍
風虎爭起陸天挺人豪蓋世姿終南白虎守九閻海
中赤螭駕青旂左提劉季右子羽縱觀咸陽能幾時

三杯拔劍舞龍泉

四海清平宇宙窄草澤多少英豪客
根芟雨露皆君賜執金吾郎一朝擢
未央殿裏肅恩命葡萄宮前談
雄略簇立勇夫兒孫列雪花襦袴爭
嘖嘖上林秋色射飛鴈講武宮殿
穿柳葉節鼓鼙報壘中錦袍加

身威名赫北漠匈奴反未已天子授鉞青冥夕元帥
斗印橫腰左烏號金箭紛裝束鳳翅銀盔映朝日魚
鱗鎖甲爭春雪風聲高撼朔方城是時元戎方啓行
魏其武安來祖席酒氣花香爭送迎軍令三杯士如
霧拔劍龍泉玲瓏舞座上觀者皆辟易楚之熊羆周
之虎始如俊鶻盤秋空更似神龍鬪江中隴首胡笳
動地來謀道匈奴夜戰迴男兒意氣重然諾許身明
光何磊落蜂屯鶴勢漭無邊紅兜錯莫黃榆烟輕騎
提出勅勒野夕陽飲馬長城下大字煌煌捷書飛一
夜腥塵塞上微擊鐙歌唱好回還長安花鳥春未闌

龍顏喜色上八彩侍臣簪笏呼南山太平宴賜上林苑期門將士午睡閒

試筆

龍眠波底幾多時虎睡巖中迷歲月斂爪藏鱗寂不聞誰知九陌春夏易

其二

龍藏鱗甲虎藏爪山谷滄波幾歲間一日風雲迷四海龍飛玉洞虎騰山

其三

後園有水老龍潛前野有山雄虎伏八極風聲虎嘯

林五章雲色龍生甲

吟客遊崑崙

崑崙游客乘春往松霧蒼然桂月朗
繇絡九峯三朶蓮玉流瀼瀼飛千丈

詠金樽

八珍仙饌雜椒薑春色先浮柏葉香
若使花樽畱月影前呼太白後知章

詠槐

亭亭槐樹井欄邊擎日依如羽葆然
遍却清陰千萬頃王家雨露仰仁天

秋聲

崢嶸秋氣一天橫
夕陽回顧又秋聲
秋聲秋聲四野仍秋
氣烈士高歌枕玉瓶

秋色

碧橘紅榴齊結子
將來秋色照前庭
內園分得玲瓏
實點檢羣芳對壁經

秋事

我看幽風七月章
移摹田野畫中明
屢甃日夜憧憧
意每在西疇襍穢氓

秋功

西風陣陣稻花香慶祝農家列萬箱農有萬箱輸賦
稅千辛一粒可能忘

漫吟

美色是狐狸貪淫則性蠱駸駸溫柔鄉萬病從根稿
慎爾獨知時節彼少年事水乾木乃隕痼甚疇可理
笑矣世間人未忍一時慾慾火竟燎原誰知七日復
忍時又忍日功成及古賢心廣體亦胖吁嗟其勉旃

唐虞舊物

乾坤開闢子丑會形形色色一極內世運十代遞升
降風俗百里相悖又唐虞古轍戴老石屹然五嶽青

不改柴烟尙畱帝駕餘三十六岫控螺黛興雲出雨
睠龜鳧玉牒金泥指嵩岱五教有如喬泰功聖人優
渥何汪濊維嶽降神生周輔人傑地靈推先輩山東
出相山西將扶輿磅礴而不沫雨露霜雪興寶藏生
長養育元氣配不騫不崩南山詩拜獻龍樓屏風繪
烏飛兔跳去不畱巨靈鑿斧今幾載

重陽

乾道不息往復迴一理平分四時開元會升降猶橐
籥山地潛藏地底雷今日何日重陽日頰頰黃花取
次栽黃花發香香滿室坐看周易參三才乾坤簡易

易之門門戶軒豁而恢恢萬事莫如和且寬幾日復
看河清回易理分明如星躔漢儒公然語茲芟動靜
語默涵一理羲皇圈中間徘徊我聞大道出於天兩
儀清濁穹而隕皎月中宵通九陌剔撥銀燈燄宿灰
天覆地載品物亨朋從爾思憧憧來莫言易理難爲
知日用飲食兼包該揚雄著書徒守玄堯夫有詩還
打乖紛然綜錯蓋取諸兩兩推去三三排天澤水火
是何謂謹爾德化徧九垓皇極君道宜體健四時相
合何盛哉木火金土天生水一居壬坎周天階三百
六十大衍數一理只在天根栽

戒酒漫筆

冠昏喪祭先王法尊用玄酒昭而格我聞崇伯子聖
人一飲醇酒疏儀狄儀狄去後三千年其間禍亂無
時無糟丘十里焚寶玉杯酒揖遜思唐虞臣有不匡
刑爲墨千古炯戒五子歌大抵狂藥迷人性前轍滔
滔一何多貴游豪舉如可禁世祿之家能由禮蠅拂
牛禪阮劉徒南渡倉皇漭無際一飲居然壑間士一
醉誤却天下事竹池醕酤禍蕭墻知非歸正比湯賁
李白一斗詩百篇識者何心事調戲我詩肆好戒酒
徒誰與爲歸崇伯子

章臺柳

綠陰細草章臺春
玉馬金鞍游俠人
三月韶光微雨後
千條楊柳曲江濱
壁間如水要離劍
座上從風劇孟輪
儻織烟絲機夜月
爲君裁作舞衣新

讀宋史

乙亥

百技聰且巧
大道一以昏
廷崇蔡童列
聚寶千里喧
民生多辛苦
廣廈恬惛惛
禁苑爲林野
異獸如雲屯
汲子世已逝
忠讜誰可言
朱門鬧歌吹
蔀屋懷愁冤
朔風自北來
腥塵滿中原
胡鼓遞相聞
四郊多戎旛
大勢如傾河
四海何紛紛
二轅狩北漠
康王起外藩

大哉李劉公直節似崑崙飛檄感義聲羽旄向都門
成功宗澤先出謀文靖論將相夫如何朝廷屢守文
那知靖康事其本由心源翩然撫八荒艮岳花石繁
書感明史

惠宗皇帝有忠臣臣節分明問幾人秉義甘心刀鋸
地誰知南渡渙音新

贊方鐵兩忠臣

姱節貞忠白日臨千秋志士淚盈襟矢心不草燕軍
詔城上真牌凜古今

贊程濟

曾中蟠鬱濟時才門闢金川夜雨來五十餘年僧衲
色絕勝姚老絳衣裁

書墨匣

鳩名八種著形殊白似沙鷗綠似鳧形與色殊皆性
道關睢功化鵲巢俱

題寢屏

路轉山回何處村桃花春水綠粼粼更看松竹續成
列疑是桃源避世人

其二

秋容糝點小池東畫桷丹簷入半空佳木千章通御

氣五柞蜚廉指顧中

賞菊

紫極宮中新酒熟清歌一曲賞秋菊菊花秋日誰題
糕詞賦高唐來宋玉

一笑行

貧士相逢貴公子金鞍駿馬光旖旎貧笑公子紅塵
面公子笑貧布衣士貧笑金玉堆如山公子笑貧形
婆娑公子笑貧貧笑貴貴貧拍手爭呵呵笑人曾海
翻慾浪一朝歸之却奈何笑人色界傾城國一朝歸
之我則那笑人苛刻如綺疏一朝歸之空咨嗟笑人

崇飲罔晝夜一朝歸之何其多笑人機關千萬疊一朝歸之爲笑囙笑人沉沉名利場笑人不能覺南柯南柯一夢春明門自來世事如流波貧貴呵呵無已時臨歧一爲呵呵歌

書與說者

丙子

善心起處人爲善普濟羣生佛亦靈爾欲歸依觀世佛楞嚴須讀雨花庭

贈人

靈劍久湮光鑠鑠大鵬初起翼翩翩丈夫得志皆如此何必林泉歲月延

其二

五鼓喧喧不暫閒一條雲磴兩重山明珠已見滄波底此去驪龍儻可攀

其三

起家年少最非常門戶榮華占後昌從此成名知不偶目前轍軻祇含光

其四

天錫洋洋百福來紅顏黃耆笑彭祖不徒恩渥偏身家康色分明皇極五

開字拈韻

東風昨夜百花開始識青春更再來青春如是年年
至河朔將傾萬萬杯

生辰祝壽詩

并小序

四五六七言詩八章卽我 慈親周甲誕辰
志慶者也再昨年甲戌敬遇我 聖上周甲
而今年又當慶年歡忭之至慶祝之深邃形
諸文字之中竊寓介眉之意用獻我 萱闈
時丙子秋七月十八日小子拜手稽首謹箋

是日何日 寶甲煌煌煌煌 寶甲萬壽无疆

其二

壽母生朝載值今辰小子舞蹈獻萬壽春

其三

今日祝何事拜獻南山春南山春不老長挹北堂萱

其四

萬年爲一日六紀卽初程宮娥爭獻繡南極老人星

其五

歡慶幸逢今日怡愉敬祝南山瑤池仙桃千歲春光

永駐慈顏

其六

九重雲開瑞日萬年枝老和風龍德慶流魚貫夜夜

流渚華虹

其七

幸逢今日喜如新拜手
萱堂祝萬春祇願年年如
此好瓊漿玉液注花茵

其八

幸逢今日又今辰小子敬祝岡陵春壽福如山更若
海拜手 萱闈瑞色氤

汾水秋風行

粵昔漢武元封中駕巡九州秦帝同朝廷雖多長孺
輩天子志在東南戎中流簫鼓忽盈耳時則汾水來

秋風秋風偏感白髮情尺二紅泥傳不窮秋之爲氣
屬於義蘋末寒聲開四聰東封西討昔何意海內十
室今九空文成五利語荒唐苜蓿葡萄春朦朧邛竹
三時意中翠宛駒千里汗餘紅方朔不言公孫睡直
諫無人披丹衷可但飛廉回帝心乃知帝心真英雄
江上萬樹吹淅瀝漢家三助天子風當年一洗白登
恥草木風前元帥功該括萬善歸于一舜殿南風歌
百工我見董子賢良辭西京五葉至治隆

秋夜月又明

繡簾捲盡畫樓頭坐看金風木葉流萬里碧霄如海

月年年高著不曾休

寫懷

永日薰風樂善齋閒聞黃鳥兩三啾幽懷萬疊誰能
解抱膝高歌動九垓

臘五

己卯

少年深學青囊書景岳東垣定讓渠緋玉橫金皆聖
賜壽民丹粒亦君餘

題兵學指南

一通兵學重添註號令形名取次明帳下諸人多有
力文皇酬答衛公成

矯首遐眺

榭林茅屋小溪邊
多少青山擁後前
荷蕒丈人何處
向白雲千載住山巔

洗心臺賞春

庚辰

滿城嘉木媚春妍
領略風光三月天
坐久洗心山日
晚鳳笙鸞吹百花前

翠微臺濃陰

萬木繁陰午景長
翠微臺上翠微涼
微微翠滴渾忘
返樓閣重重已夕陽

漢江泛舟

辛巳

紫閣峯前漢水漣碧林青草澹無邊順流直欲荆門
去千里荆門日杳然

西京贈人

翩然飛鶴過西洲勝似江南第一州借問朝天何處
是一雙麟馬立江頭

戲贈坡平主人

昔日淮陰報潁娘凡人有德貴無忘雲孫一幅傳千
載畱作君家鎮世光

蹒跚九萬

坎離交媾生津涎二八三九丹鼎燃內丹之三外丹

并精氣神爲汞土鉛四十九日圓一數一萬六千脫
真元八卦爐中開混沌五行壺裏存乾坤丹田右脅
至寶胎吸呼三萬六千息按摩引導翕六氣黃庭古
經論道跡風虎雲龍守右左玄龜赤蛇來後前採氣
採神又採真九九轉丹成地仙逢之九萬脫蟬蛻甲
乙庚辛河車先知白守黑陰陽隄薔薇稚老薺麥連
日行八百名乃稱身邊衲衣孔千穿劈裂鴻濛出靈
根莫笑世人形貌惡二十八宿環而列隱隱青霞迷
赤壁丁丁冰心以鐵軟弘弘道氣春日同游精八極
到方丈閬苑之西蓬海東那知九萬神仙跡先現卅

四修丹功

定庵詩集

卷一 詩

四五

凌虛閣漫稿

凌虛閣漫稿卷之一

凌虛關漫稿卷之二目錄

疏

辭傳位疏 壬申

再疏

三疏 未徹

啓

詣彰義宮閣外口啓 壬申

再啓

三啓

四啓

五啓

六啓

七啓

批判

領議政金在魯左議政趙顯命聯劄批

已巳

輔德金尙喆等聯書批

兵曹判書金尙魯請捕將具善行仍任書批

通德郎申暲抄選後辭職書批

持平韓光肇論人達批

正言俞彥國請禁僧尼出入都城達批

正言具允明陳勉書批

文學鄭寀請講筵書批

大司憲沈鎔乞遞書批

判府事閔應洙乞免內局提舉書批

八道儒生朴徽鎮等請右參贊李緯建祠書批

正言朴起采陳勉仍請先正臣宋時烈配享

廟庭書批

進善尹鳳九陳勉書批

正言朴起采論平安兵使趙東夏等書批

正言李克祿請朴璲韓德良改正柳思欽削圈

達批

正言朴起采論及第沈鈇達批

左議政趙顯命乞免劄批

兼司書徐志修陳戒書批

左參贊元景夏書批

應教黃景源等請勘承旨書批

諫院前達及驪川君增削黜達批

成均生員趙恆彥等書批

正言俞漢蕭陳戒仍論銓官儒臣書批

司書李敏坤書批

正言朴師訥陳勉仍論崇塾及驪川君增書批
掌令柳綽論驪善君學及鍾城府使金遇詰達

批

領議政金在魯因人言乞免劄批

前京畿監司金若魯辭拜相書批

領議政金在魯劄批

全羅監司韓翼暮書批

前京畿監司金若魯再書批

大司憲沈鎔乞遞書批

判府事閔應洙引咎書批

刑曹判書申晚乞遞兼帶藥院賓客書批

掌令具允明言事書批

判府事閔應洙引義乞解內局提舉書批

判府事閔應洙再書批

前吏曹判書鄭羽良辭拜相書批

前吏曹判書鄭羽良再書批

掌令宋能相陳師道是非仍辭召命書批

庚午

左議政金若魯因人言引咎劄批

吏曹判書金尙魯辭職書批

前領敦寧趙顯命乞免書批

持平鄭恆齡請全家滄死人蠲賦書批

正言李顯重請遞改參覈使南泰耆書批

執義申暲論喉院退斥故參贊金榦建祠疏書

批

戶曹判書朴文秀陳病乞遞書批

全羅道幼學李廷燭等請兩先正宋時烈宋浚

吉從享書批

慶尙道幼學盧相坤等請兩先正宋時烈宋浚

吉從享書批

右議政鄭羽良引親年乞免劄批

祭酒沈鎔辭職書批

右議政鄭羽良陳勉劄批

辛未

領府事金在魯乞致仕書批

判敦寧李箕鎮乞致仕書批

戶曹判書金尙魯辭職書批

右議政鄭羽良引親年乞遞劄批

廣州畱守李宗城引義辭職書批

兵曹判書洪啓禧辭金吾次堂議處之命書

批

右議政鄭羽良乞免正使劄批

持平李晉吉論人書批

應教洪樂性言事書批

左議政金若魯引咎劄批

左議政金若魯再劄批

左議政金若魯三劄批

右議政鄭羽良乞免劄批

平安監司趙載浩引咎乞遞書批

執義李昌儒論人書批

吏曹判書李天輔引咎乞遞書批

慶尙道進士南道轍等請兩宋先正從享書批

北評事李彝章賑濟飢民書批

領敦寧趙顯命引義請譴書批

右參贊元景夏引咎書批

獻納黃柙伸救李存中達批

副提學尹汲伸救李存中劄批

右承旨黃景源伸救言官書批

修撰安允行伸救言官書批

左議政金若魯引義書批

右議政鄭羽良乞免仍辨左相金若魯被彈劄

批

大司諫徐命臣正言尹學東書批

左議政金若魯因臺言乞免書批

政院因正言尹學東上書還給令旨繳還後達

批

黃海監司曹命采因臺言乞遞書批

持平蔡濟恭請還寢臺臣投畀達批

掌令權基彥伸救臺臣兼乞遞書批

戶曹判書金尙魯因臺言乞遞書批

領議政金在魯引疾乞免書批

左議政金若魯因臺言乞免書批

領敦寧趙顯命引疾書批

靈城君朴文秀辭職書批

戶曹判書金尙魯因人言辭職書批

持平朴起采論良役書批

判府事金在魯引義書批

判府事金若魯引咎書批

領議政金在魯引疾劄批

持平安致宅論人達批

正言吳瓚請嚴懲討書批

掌令姜必慎陳魚鹽船稅弊端書批

領府事俞拓基引疾乞退書批

修撰李奎采請宥李存中李惟秀書批

左議政趙顯命因人言乞免劄批

三司請趙泰億削奪官爵合達批

正言吳瓚前達及請宥李存中李惟秀仍請李

宗城絕島安置前後停啓諸臣遠竄達批

同義禁申思建因赦文書中李存中李惟秀等

置諸放秩大臣筵斥劄論引義乞遞書批

持平張澍伸救諸臺書批

領議政金在魯引咎乞免劄批

平安監司金尙魯辭職書批

兵曹判書洪啓禧引義書批

左議政趙顯命因人言乞免劄批

戶曹判書金尙星因臺臣閔百祥書引咎書批

左議政趙顯命因人言乞免書批

京畿儒生金時準言事書批

黃海監司曹命采因人言辭職書批

輔德沈墿等請開兩筵書批

主簿崔載興因臺言乞遞書批

掌令鄭廣運請故參判李壽徵子若孫刊去臺

選仍論銓官書批

掌令鄭廣運又論銓官避嫌達批

正言朴璿前達及請李存中等移配絕島還收

達批

領議政金在魯引咎乞免劄批

兼司書李命熙陳勉乞遞書批

正言李星慶論均役及北關轉粟書批

禮曹參判洪鳳漢以東園提舉事引義乞遞書

批

原興君煦夫人黃氏上言判

正言尹得養論尹光毅黃晟趙明謙書批

壬申

前兵曹判書李天輔辭右議政書批

持平李仁源李萬恢辭職請還收物故罪人增

放送之 命書批

司直李宗城辭新拜右議政書批

右副承旨任璩請臺臣處置定規書批

月城尉金漢蓋辭新資書批

司直金聖應請收禁營兼察之 命書批

前司直李宗城引咎乞免書批

進士申光敬等請先正兩宋文正從享文廟書

批

幼學金普淳等又請兩宋先正臣從享文廟書

批

前司直李宗城辭左議政書批

前司直李宗城辭免書批

待罪臣金若魯引義書批

禮曹判書元景夏辭職書批

領議政李宗城引義書批

禮曹判書元景夏引疾乞免請周甲賀禮按例

舉行書批

左議政李天輔引疾乞免劄批

凌虛關漫稿卷之二目錄

凌虛關漫稿卷之二

疏

辭傳位疏

壬申

伏以臣以萬萬不肖濫承代理之命夙夜憂懼罔知攸措千萬夢想之外又伏聞不忍聞之教心膽俱墜若隕淵谷顧臣不孝無狀不能感回聖心夜已曙矣日已晏矣臣罪至此不如無生卽欲鑽地以入而不可得也噫今聖筭方富聖德日隆化洽八域功邁三王而忽此罔極之舉遽形絲綸臣自聞此教驚惶震剝五內失守雖晷刻之頃豈忍退處私室乎

茲敢冒萬死席藁門外仰瀆 聖明之下臣尤死罪
臣尤死罪伏願 聖上亟收下政院之教以重 宗
社千萬幸甚千萬幸甚臣無任瀝血祈懇之至

再疏

伏以臣於昨日之疏略控焦遑罔措之忱而誠孝淺
薄不能仰格咫尺 天威不賜允許連降不忍聞之
教心隕膽墜不知所以噫今 聖意雖堅固當此之
時臣惟死而已敢不冒萬死力請期於還收乃已乎
伏願 聖上俯照臣心之崩迫亟降俞音反汗昨日
之教以重 宗廟社稷千萬至願臣進伏門外之際

奄聞嚴教方寸如割未敢前進不得不黽勉退還席
藁待 命敢以再疏煩瀆於 聖明之下臣罪當死
臣罪當死瞻望雲天無任泣血煎迫之至

三疏

未徹

伏以臣兩日再疏未蒙賜答五內如焚卽欲無知今
朝又伏聞有閉閣之舉心神爽越急進宮門之外伏
地待 命連降罔極之教無非臣子所不忍聞辭旨
轉益罔極漸加於初不勝驚惶戰慄亦不敢晏然久
伏泣涕退還席藁庭中噫今至三日不得反汗臣罪
一也再進門外黽勉而退臣罪二也席藁兩日誠不

能格回 聖心臣罪三也只有焦遑泣血竢罪待
命而已噫以 聖上至明至仁何乃不卽夫降收還
之俞音上以重 宗社之托下以副生民之望乎仰
瀆 聖明已至于三臣尤死罪伏願 聖上亟收下
政院之教千萬幸甚千萬幸甚臣無任懇迫焦泣之
至

啓

詣彰義宮閣外口啓

壬申

昨伏承不忍聞之教不敢爲進身之計矣夜來過舉
轉加而不孝誠淺未能感回焦遑罔措來詣閣外待

命矣

再啓

雖下不忍聞之教一日二日又將至夜深尚無回鑾之期焦煎罔措雖寸步無退去之意矣

三啓

下教之不忍聞者凡幾遭矣還宮之期益復邈然矣夫豈有一分緩聲之意又豈有一步旋踵之心乎采增惶恐仍爲待命所頒手書亦不忍奉承茲敢封納矣

四啓

臣誠淺孝薄未能感回 天心連承不忍聞之教臣
尤死罪中心如割下教雖如此何敢退去乎卽爲上
殿千萬伏祝 手書亦不得已還納矣

五啓

下教之不忍聞不忍聞每如此臣尤死罪二次陳章
而不爲賜批焦迫罔措之極臣尤死罪更無可達之
辭矣

六啓

下教之不忍奉承每至如此雖入去無異於在此臣
尤死罪更無可達之辭矣

七啓

下教每如此更無可達之辭不得已排闥直入矣

批判

領議政金在魯左議政趙顯命聯劄批

已巳

覽劄具悉卿懇代理之教出於意外顧余誠意淺薄
終不得反汗 成命克回 天心情理萬萬焦迫五
條豈敢或忽當銘心服膺

輔德金尙喆等聯書批

覽書具悉第二件之事終不得反汗焦迫悶鬱所陳
當畱念

兵曹判書金尙魯請捕將具善行仍任書批

覽書具悉稟于 大朝則意雖是也其人可此任爲
教矣

通德郎申暲抄選後辭職書批

覽書具悉爾懇余意已諭控辭至此不其過乎其勿
固辭從速上來

持平韓光肇論人達批

稟于 大朝則其時宗臣所請過矣推考宜矣李世
師其時處分意蓋在焉李彥燮意亦有在焉敢更請
於聽政之初乎若此則凡諸處分其將紛紜於元良

分義不然代理之初界限宜嚴秋判所請雖過矣擇
其任之時豈可靳持爲教具聖任閔堦備堂訓將事
及用人開言路下諭事並依達

正言俞彥國請禁僧尼出入都城達批

稟于 大朝則若曰噫吾民之爲僧豈樂爲乎專由
良役其本民也聽政之初請禁是也

正言具允明陳勉書批

覽書具悉縷縷陳誠亶出於憂愛之忱余甚嘉尙雖
一時豈敢忽哉爾其勿辭救護母病

文學鄭寀請講筵書批

覽書具悉微感之候則少愈而眼部不平故不得行
兩筵待差勝當爲之矣

大司憲沈鎔乞遞書批

覽書具悉卿懇卿其勿辭從速上來出入講筵補我
不逮

判府事閔應洙乞免內局提舉書批

覽書具悉卿懇 大朝每致慨於卿之在鄉奚徒今
日小子待卿之心切乎不參問候旣諒之卿其體
大朝慇懃之意顧小子初政之望安心勿辭其卽上
來用副此意

八道儒生朴徽鎮等請右參贊李緯建祠書批
覽書具悉書院申飭之時豈敢請也於諸儒務質之
道惟在學問中且况八道儒生云云尤涉浮誇初政
之時宜尚質爲教退修學業

正言朴起采陳勉仍請先正臣宋時烈配享
廟庭書批

覽書具悉先正追配豈可輕議此等所重處宜慎重
爲教余何復諭乎

進善尹鳳九陳勉書批

覽書具悉爾懇所陳六條憂愛之忱溢於言表余甚

嘉歎可不服膺爾其勿辭從速上來出入講席輔我不逮

正言朴起采論平安兵使趙東夏等書批

覽書具悉趙東夏事近者武臣卽操弓之儒心常慨然末擬點下意蓋在矣特除之下事雖欠穩其何深非旣承大朝之教矣當該承旨有做錯直當請推言何模糊推考宜矣爾其勿辭俟母病間察職

正言李克祿請朴璲韓德良改正柳思欽削圈

達批

柳思欽更圈意蓋廣取召試已過今請其涉過矣韓

德良等事此時先務另擇豈徒此人今者之請可謂
插軟爲教並不從

正言朴起采論及第沈鈇達批

沈鈇事因此思之而知其事矣鈇於今豈有毫累而
猶如是斷斷豈幾年苦心其涉過矣爲教須抑此等
之習

左議政趙顯命乞免劄批

覽劄具悉卿懇以此稟于大朝則自現者若同律
是豈王者用律之意乎宜皆分揀而其所處分者意
亦嚴其事也噫予雖衰耗豈爲一趙載洪伸恩乎旣

無心而分等處之則非私也若或有心而自引不其
近於私乎爲教 大朝下教若此卿其安心勿辭視
事焉

兼司書徐志修陳戒書批

覽書具悉憂愛陳戒言深懇切余甚嘉尙可不畱念
焉爾其勿辭從速察職

左參贊元景夏書批

覽書具悉將卿所陳奏于 大朝而尊周之心焉敢
忽乎相批下教由於慨然爲教卿其勿辭進班

應教黃景源等請勘承旨書批

覽書具悉 大朝靜攝之時豈可煩稟陳達於 大朝入侍雖或爲可請于余非也爾等勿辭察職

諫院前達及驪川君增削黜達批

末端事其所初奏一端忠心 大朝面諭亦已曲盡而參班陳章亦在達辭之前則其何若此况崇塾自崇塾驪川自驪川律名亦不襯著余之所遵奉者卽常訓及政訓况親承下教者乎亟停勿煩

成均生員趙恆彥等書批

覽書具悉此等莫重之事何若是輕論多士之因事感慨其心雖嘉大抵俗習因其事會每欲張大新奇

此大朝尋常悶之者也仰體比周之教濟濟思皇
悅豫我大朝靜攝中聖心則是乃誠實底道理
也今於初政豈事文具率諸生退歸賢關欽遵三
朝勉飭之聖意

正言俞漢蕭陳戒仍論銓官儒臣書批

覽書具悉憂愛陳戒言甚懇切可不畱念焉末端所
陳則此亦起鬧之一端余實未曉也爾其勿辭救護
母病

司書李敏坤書批

覽書具悉所陳五條言深懇切而以崇孝道爲第一

條件其意尤爲切實余甚嘉尙可不畱念焉爾其勿
辭蒞其少間從速察職

正言朴師訥陳勉仍論崇塾及驪川君增書批
覽書具悉所陳切是當銘心服膺焉崇塾及驪川君
事 大朝已教矣爾其勿辭從速察職

掌令柳綽論驪善君學及鍾城府使金遇詰達
批

驪善事過矣過矣於 聖心何金遇詰事特教之
聖意有在矣

領議政金在魯因人言乞免劄批

覽劄具悉卿懇年少挾雜之意何必撕捱况既命給其疏矣又何自引卿其安心勿辭卽起視事

前京畿監司金若魯辭拜相書批

覽書具悉卿懇今者相職允叶枚卜余今代理之初政幸輔相之得人曾於昔年已有此例卿須安心勿辭其卽視事用副 聖揀之意

領議政金在魯劄批

覽卿之懇噫今小子代理之後攸恃者三公而左揆許副鼎席只有卿惟待右相之出仕共輔不逮卿乃一劄三劄其懇采切不得不稟于 大朝則下教若

曰古有此例時任或多同席之時矣一欲枚卜而領相之謹飭知之也深故尚今未果卜相之日亦既諒之此所謂得一相而免一相國事悶迫不忍許副今則其懇可質蒼蒼亦杜新相造朝之途噫領相於國事多勞瘁一解休息亦待大臣之道特許勉副爲教謹遵 聖教許免而小子代理之初悵然何諭

全羅監司韓翼暮書批

覽書具悉所陳其涉寒心莫重薦新之若此此必京外下吏從中作俑之致令該曹嚴查重繩道臣推考當該封進官事並置之卿其勿辭從速察職

前京畿監司金若魯再書批

覽書具悉卿懇前批既諭卿何若此此時輔相只有
卿一人卿之造朝余日望之以卿爲國懃懃之心荷
眷遇何如而一向邁邁其可乎領相之勉副至懇卽
欲使之一休之 聖意卿以此爲引過矣過矣卿須
體 大朝枚卜之意顧小子思卿之心安心勿辭其
卽視事

大司憲沈鎔乞遞書批

覽書具悉卿懇 大朝特諭業已詳及卿須體 大
朝懃懃之意諒小子初政企卿之心安心勿辭幡然

上來用副此意

判府事閔應洙引咎書批

覽書具悉卿懇 大朝宣諭 聖意待卿偕來卿猶

邁然辭章踵至豈徒小子爲 聖意悶鬱 大朝之

心尤爲何如哉卿之所遭 聖鑑旣洞悉矣小子亦

承下教而知之卿何介意卿須體 大朝之至意思

今日保護之重安心勿辭卽日入來

刑曹判書申晚乞遞兼帶藥院賓客書批

覽書具悉問候體重提舉之任許遞至於春坊今當
代理何拘之有哉勿辭行公

掌令具允明言事書批

覽書具悉稟于 大朝則堂下官服色雖法典所載
近者行之已久昔年欲復舊而未果矣揮項事已諭
大臣油蜜果事旣禁其過侈此則過矣禁酒事頃者
下教民若不從豈曰海東之民乎禁亂侵民決不可
爲加髻事人皆曰云然余則曰無可代者噫髻非侈
矣務多爲侈加髻非古雖總角若侈髻豈不濫費以
士大夫之家而髻之大若異俗然而不能禁用髻之
多視而爲常乃有此等之請余莫曉也此正士大夫
先自修齊之事也

判府事閔應洙引義乞解內局提舉書批

覽書具悉卿懇噫 大朝下教開釋備至又命偕來
卿何一向若此卿之心可質蒼蒼且今 大朝近有
搔癢之候尙未快瘳方切焦悶卿帶藥院豈可一向
處外况有備員入侍之教亦豈言私之時乎安心勿
辭其卽偕來備員入侍承 大朝思卿之教悶迫之
極諭以手書卿卽偕入

判府事閔應洙再書批

覽書具悉卿懇手諭之後待卿幡然莫能致之卿章
又到近者藥院鎮日問候之時惟俟都相之入來而

卿尚今在外將以何語仰奏 大朝噫 大朝以特
恩放卿子開卿進身之道以卿爲國之心當 聖候
靜攝之時豈忍一向邁邁其卽偕來備員問候

前吏曹判書鄭羽良辭拜相書批

覽書具悉卿懇今者大拜允叶于時望代理之初只
有一相今幸鼎席添一余心忻甚 大朝下教若曰
爲汝以備鹽梅顧小子倚恃卿等之心一倍於前卿
其安心勿辭其卽筵朝共濟國事

前吏曹判書鄭羽良再書批

覽書具悉卿懇初批旣諭矣小子初政倚恃者惟輔

相卿以無他之心同寅之量事 大朝而輔小子卽
余日夕待卿者卿其遵 大朝委毗之 聖意體小
子慇懃之苦心安心勿辭其卽視事

掌令宋能相陳師道是非仍辭召命書批

庚午

覽書具悉爾懇其時重臣所陳余詳聞之無乃風傳
之錯耶爾其勿辭其卽上來補我不逮

左議政金若魯因人言引咎劄批

覽劄具悉卿懇 大朝旣下敦諭余何更詰而小子
倚仗惟在輔相况 大朝處分之後紀綱自此嚴矣
卿其安心勿辭其卽視事用副小子之望

吏曹判書金尙魯辭職書批

覽書具悉特簡 聖意勤至分義豈若是也况今
親行誓戒在夜卿勿過辭從速膺命

前領敦寧趙顯命乞免書批

覽書具悉卿懇特拜卿相職鼎席備員爲世道幸甚
而 大朝幾年調劑之 聖意爲小子協贊初政噫
以卿與共休戚之義豈忍過辭卿須遵 大朝之苦
心體小子之至意安心勿辭其卽視事

持平鄭恆齡請全家渰死人蠲賦書批

覽書具悉所陳切是當畱念全家渰死者各別詳抄

卽速申聞事分付諸道道臣爾其勿辭從速察職

正言李顯重請遞改參覈使南泰耆書批

覽書具悉初登此職挾雜之意敢售於大朝特差
之下今余代理之時乎良可寒心

執義申暲論喉院退斥故參贊金榦建祠疏書

批

覽書具悉爾懇有禁令也故承宣之道不得不如此
爾其勿辭從速上來輔我不逮

戶曹判書朴文秀陳病乞遞書批

覽書具悉臺言之過當余亦知之大朝業已開釋

而况今金吾滯囚極爲可慮卿其勿辭俟病少間從
速行公

全羅道幼學李廷燭等請兩先正宋時烈宋浚
吉從享書批

覽書具悉茲事 大朝曾已下教矣爾等退修學業
慶尙道幼學盧相坤等請兩先正宋時烈宋浚
吉從享書批

覽書具悉茲事 大朝已下教矣退修學業
右議政鄭羽良引親年乞免劄批

覽劄具悉卿懇日昨手書已悉余意復何多諭但卿

宜思古人忠孝本無二致之言須勿過辭其卽視事
用副余如渴之望

祭酒沈鎔辭職書批

覽書具悉卿懇卿勿過辭幡然上來用副余意

右議政鄭羽良陳勉劄批

辛未

覽劄具悉卿懇以疾未參有何所傷陳勉切至敢不
畱念卿其安心勿辭善攝

領府事金在魯乞致仕書批

覽書具悉卿懇卿雖老矣尚亦強健何可輕許卿須
勿辭安心

判敦寧李箕鎮乞致仕書批

覽書具悉今茲所請不可輕許卿勿過辭上來

戶曹判書金尙魯辭職書批

今者此任 聖意有在卿其勿辭從速行公

右議政鄭羽良引親年乞遞劄批

覽劄具悉卿懇向者旣聞詳陳何必更懇以今日之
國事卿何徒循私懇卿須諒焉

廣州畱守李宗城引義辭職書批

覽書具悉此等之言何足掛念卿其勿辭察任

兵曹判書洪啓禧辭金吾次堂議處之 命書

批

覽書具悉春寒猶甚滯囚可慮卿何過嫌卽爲舉行

右議政鄭羽良乞免正使劄批

覽劄具悉卿懇 大朝特差 聖意有在卿須勿過

辭安心視事

持平李晉吉論人書批

覽書具悉風聞之言何可盡信戈戟之說余實未曉
語涉過矣爾其勿辭察職

應教洪樂性言事書批

覽書具悉一則 大朝申飭所重在焉一則仰承

大朝下教給之則何敢更稟揆以事體寒心甚矣爾其勿辭察職

左議政金若魯引咎劄批

覽劄具悉卿懇過當之言何必爲嫌卿其安心勿辭卽起視事

左議政金若魯再劄批

覽劄具悉卿懇前劄已諭復何過嫌卿須安心視事左議政金若魯三劄批

覽劄具悉卿懇前劄已諭而又何過辭今覽北關之狀達心甚驚慘卿豈可一刻引入乎卿其安心勿辭

卽起視事用副余意

右議政鄭羽良乞免劄批

覽劄具悉卿懇卿之所辭決無輕許卿須體大朝
慇懃又念小子至意安心勿辭卽起視事

平安監司趙載浩引咎乞遞書批

覽書具悉如此之言何必過嫌卿其勿辭從速赴任
執義李昌儒論人書批

覽書具悉第一件事所陳似過矣第二件第三件事
依施營將守令事遠外風聞其何盡信汰去事及重
推事亦過矣爾其勿辭從速察職

吏曹判書李天輔引咎乞遞書批

覽書具悉卿之爲嫌過矣且莫重教文不可遲滯卿
勿過辭從速行公

慶尙道進士南道轍等請兩宋先正從享書批

覽書具悉此事 大朝已下教矣復何更稟退修學
業

北評事李彝章賑濟飢民書批

覽書具悉今見所陳吾民饑饉之狀宛若目睹書辭
亟令廟堂稟處爾其勿辭

領敦寧趙顯命引義請譴書批

覽書具悉卿懇以疾未參其何所傷而向者 大朝
敦勉 聖意慤懃豈可引退乎卿須安心勿辭幡然
上來用副余區區之望

右參贊元景夏引咎書批

覽書具悉過當之言余亦知之卿之撕捱不亦過矣
乎卿其勿辭從速入來行公

獻納黃柙伸救李存中達批

不從泰績事亟停勿煩李存中事 聖教嚴明豈敢
若此殊涉寒心矣勿煩

副提學尹汲伸救李存中劄批

覽劄具悉下教之下復何若此其在分義極爲駭然
余則惟知仰體 聖意矣

右承旨黃景源伸救言官書批

日昨筵中 聖教嚴明人臣分義固如是乎誠可寒
心爾章給之

修撰安允行伸救言官書批

覽書具悉仰承 聖教不覺感泣焉敢若此殊涉寒
心爾其勿辭察職

左議政金若魯引義書批

覽書具悉卿懇日昨 大朝開釋洞諭而筵中仰奉

下教不覺淚下且國事方艱以卿爲國丹心豈忍告
退卿須體大朝慙之意顧小子區區之望安心
勿復過辭卽日入城用副如渴之意

右議政鄭羽良乞免仍辨左相金若魯被彈劾
批

覽劄具悉卿懇前劄已悉余志更何多諭且大臣之
責不如小官之奔走視事之暇亦足有盡孝之道矣
臺臣所誣余旣知之所陳當銘心卿須勿過辭卽起
視事

大司諫徐命臣正言尹學東書批

覽書具悉 聖上聖讒之教既嚴且正則人臣分義
豈敢更言誠極駭然爾其勿辭察職

左議政金若魯因臺言乞免書批

覽書具悉卿懇前下手書而因余誠淺無意登道心
深愕然噫如此誣罔之言卿何掛齒且今鼎席俱空
國事方艱卿須體 大朝眷遇之意顧小子日夕之
望即日就道

政院因正言尹學東上書還給令旨繳還後達
批

聖教嚴明而臺臣之所陳又如此故給之矣然今所

陳大體得宜其書入之

黃海監司曹命采因臺言乞遞書批

覽書具悉 大朝旣已開釋洞諭於卿別無難安之
端卿其勿辭從速察任

持平蔡濟恭請還寢臺臣投畀達批

金鼎九投畀之 命聖意蓋出於嚴紀綱則余何敢
稟勿煩中官文道器 大朝已下教矣

掌令權基彥伸救臺臣兼乞遞書批

覽書具悉臺臣投畀 聖意有在爾其勿辭救護母
病

戶曹判書金尙魯因臺言乞遞書批

覽書具悉誣言何足掛念而 聖教已洞釋卿須勿
過辭從速上來行公

領議政金在魯引疾乞免書批

覽書具悉卿懇 大朝敷諭余復何詰誣罔之言余
亦洞知在卿毫無可嫌之端顧今鼎席久曠籌務多
滯心甚罔涯卿年雖高而氣猶健卿須體眷眷如渴
之至意安心勿辭卽起視事以濟時艱

左議政金若魯因臺言乞免書批

覽書具悉卿懇匪彝之言其何掛念不腆之廩又何

過辭卿須安心勿辭幡然就道

領敦寧趙顯命引疾書批

覽書具悉卿懇 大朝敦勉之後卿何一向引入卿
須安心勿辭即日入城用副余意

靈城君朴文秀辭職書批

覽書具悉 大朝特教之下如是控引實涉過當卿
其勿辭從速入城行公

戶曹判書金尙魯因人言辭職書批

覽書具悉此等之誣 大朝既已開釋於卿何有卿
須勿過辭從速上來行公

持平朴起采論良役書批

覽書具悉茲事已講究何若是紛紜爾其勿辭救護
母病

判府事金在魯引義書批

覽書具悉卿懇前批已竭余意而因余誠淺未能見
孚於卿心心實恧焉且 聖教勤懇旣又勉副則於
卿有何難安之端其勿過辭卽日入城用副余意

判府事金若魯引咎書批

覽書具悉卿懇卿莫我顧余實忸怩幸因 大朝勤
懇之諭致卿入城甚以爲幸矣今覽此書旋用愕然

噫以卿爲國之丹心豈棄余若是邁邁乎况保護任
重卿須體大朝聖意顧小子懸望其勿過辭安心
卽日入城

領議政金在魯引疾劄批

覽劄具悉卿懇于今國事方艱而廟裁久曠心甚悶
然且次對之闕却已至數月卿須安心勿復過辭卽
起視事

持平安致宅論人達批

驪川事尙爾例達殊涉寒心亟爲停達勿復更煩李
墳事及方哥事過矣李普淳事依施柳世德事及李

彥燮事遠外風聞何可盡信尹得載事余未曉也朴
文秀事 大朝所除何乃如是爲言

正言吳瓚請嚴懲討書批

覽書具悉余則但當遵奉 聖意且况 大朝之幾
年苦心乎誠涉寒心爾其勿辭察職

掌令姜必慎陳魚鹽船稅弊端書批

覽書具悉 大朝已講究何敢更稟爾其勿辭從速
察職

領府事俞拓基引疾乞退書批

覽書具悉卿懇 大朝敦諭懃懃懇懇卿何一向如

是引退乎卿須安心勿復過辭幡然入來

修撰李奎采請宥李存中李惟秀書批

覽書具悉李存中事未經稟裁遽然放釋甚爲未安故置之豈因大臣之言而然哉余則仰體 聖心矣

左議政趙顯命因人言乞免劄批

覽劄具悉卿懇余於茲事惟 聖心是遵是奉卿於何有而况過當之言不必掛意卿安心須勿過辭卽起視事

三司請趙泰億劄奪官爵合達批

豈敢如是浮囂良可駭也况今日臣子若思 大朝

之幾年苦心豈忍更鬧於余亟爲停達

正言吳瓚前達及請宥李存中李惟秀仍請李
宗城絕島安置前後停啓諸臣遠竄達批

不從驪川事亟爲停達勿爲更煩還收事當初 聖
教嚴明則余之不稟而遽然踏下甚覺驚悚又何連
達李宗城事如此挾私之言敢鬧於余乎末端事並
亟爲停達

同義禁申思建因赦文書中李存中李惟秀等
置諸放秩大臣筵斥劄論引義乞遞書批

覽書具悉雖無勿揀赦典之命其時 聖教嚴明則

何敢遽然置放殊涉疎忽卿其勿辭察職

持平張澍伸救諸臺書批

覽書具悉日昨大朝處分之後何敢肆然如是極涉駭然爾其勿辭察職

領議政金在魯引咎乞免劄批

覽劄具悉卿懇大朝辭教至正且大則卿何過辭卿須安心卽起視事

平安監司金尙魯辭職書批

覽書具悉今茲特除聖意有在卿須勿過辭速往欽哉

兵曹判書洪啓禧引義書批

覽書具悉申飭只推 聖意俱在卿何敢撕捱卿其
勿辭從速行公

左議政趙顯命因人言乞免劄批

覽劄具悉卿懇向卿所達別無他意浮囂之言何足
掛念且大事方張當此暑熱 聖上又臨門矣以卿
恆日爲國之丹心豈忍引退乎卿須安心勿復控辭
強疾視事共濟時艱

戶曹判書金尙星因臺臣閱百祥書引咎書批
覽書具悉挾雜之言不須費舌卿須勿過辭從速入

來行公

左議政趙顯命因人言乞免書批

覽書具悉卿懇誣罔挾私之言余悉洞知何過爲嫌至於脅弄等語尤爲壞理余甚痛之且以卿爲國之血誠雖困於頰舌豈忍告退卿須安心勿復控辭幡然登途用副余意

京畿儒生金時準言事書批

覽書具悉稟于大朝嘉其經綸爲教矣

黃海監司曹命采因人言辭職書批

覽書具悉殿最是重其何敢撕捱卿須勿過辭從速

察任

輔德沈墜等請開兩筵書批

覽書具悉所陳切至可不畱念昨聞下教之後豈不欲卽爲開筵而前恙猶未瘳姑不得遂意心甚悶然
主簿崔載興因臺言乞遞書批

覽書具悉爾懇過當之言余已知之何必爲嫌爾其勿辭從速上來補我不逮

掌令鄭廣運請故參判李壽徵子若孫刊去臺
選仍論銓官書批

覽書具悉還收事依施而其下段之辭語多模糊隱

然復售挾雜之心此等之習余未曉也爾其勿辭察
職

掌令鄭廣運又論銓官避嫌達批

向者書辭闖呈舊習而語多模糊只以未曉答之矣
今覽避辭挾私營護之心曉然莫掩且於頃者以致
煩 聖心尚今悚慄則爲今日臣子者焉敢復售挾
私營護乎殊極無嚴掌令鄭廣運遞差

正言朴瞻前達及請李存中等移配絕島還收
達批

驪川事尚今斷斷實涉未安李存中事初雖遽然下

令更爲仍置則何敢更煩至於還收移配事 大朝
下教昭揭日星又敢營護乎殊極無嚴

領議政金在魯引咎乞免劄批

覽劄具悉卿懇前批已悉余志而尙且如此但愧誠
意之未孚卿須安心勿復過辭其卽視事用副余日
夕之望

兼司書李命熙陳勉乞遞書批

覽書具悉憂愛陳勉言甚切至余甚嘉尙可不畱念
爾其勿辭俟病少間從速上來察職

正言李星慶論均役及北關轉粟書批

覽書具悉均役事 大朝已定之處分又何云云末
端事令廟堂稟處陳勉爾言切至余甚嘉尙當體念
爾其勿辭從速察職

禮曹參判洪鳳漢以東園提舉事引義乞遞書

批

覽書具悉一時之務何必過嫌提舉事事勢固然依
所陳許遞

原興君煦夫人黃氏上言判

今覽上言方哥之作拏詬辱士夫行喪事涉駭然令
該曹從重科治職在重品身居宗班以此見辱殊涉

非矣令其家改卜他地以葬事分付

正言尹得養論尹光毅黃晷趙明謙書批

壬申

覽書具悉尹光毅事所陳過矣黃晷事 大朝當初
除拜 聖意有在趙明謙事 大朝處分我何更稟
爾其勿辭察職

前兵曹判書李天輔辭右議政書批

覽書具悉卿懇卿之枚卜也 大朝教余若曰今爲
汝備鹽梅此乃名相之孫卽予之倚仗者今之相可
謂得人予心解矣汝須善爲敦勉鼎席旣備下教若
此余有復於卿卿豈不知感卿須體 大朝之意安

心勿辭卽起視事

持平李仁源李萬恢辭職請還收物故罪人增
放送之 命書批

覽書具悉朝者下令已諭於政院矣昨夜 聖教至
矣况已故之後乎殊涉未安矣爾其勿辭從速察職
司直李宗城辭新拜右議政書批

覽書具悉卿懇 大朝枚卜以後下教小子如左揆
新拜時又教曰思其君思其父必當竭誠卿之父子
爲國誠心余亦洞悉卿須體 大朝之意安心勿辭
其卽上來輔我初政

右副承旨任璪請臺臣處置定規書批

覽書具悉茲事必有舊例遵舊例行之宜矣其何如是爭鬧乎既云有舊例則所陳依施

月城尉金漢蓋辭新資書批

覽書具悉 大朝下教之事我何更稟卿其勿辭

司直金聖應請收禁營兼察之 命書批

覽書具悉茲事雖有近例 大朝所命余何許遞卿其勿辭

前司直李宗城引咎乞免書批

覽書具悉卿懇誣罔之言余已知之而况 大朝開

釋處分之後乎決無輕許之理安心勿復控辭

進士申光敬等請先正兩宋文正從享文廟書

批

覽書具悉 大朝已諭又何更稟爾等退修學業

幼學金普淳等又請兩宋先正臣從享文廟書

批

覽書具悉茲事昨日館儒之書已悉今何復諭爾等
退修學業

前司直李宗城辭左議政書批

覽書具悉卿懇向者 大朝累次敦勉至懇至切且

今大朝連進湯劑方在靜攝之中敦諭諄諄而卿豈忍當此之時恬然思退乎卿須安心勿復控辭幡然登途用副雲霓之望

前司直李宗城辭免書批

覽書具悉卿懇大朝敦諭非止一二而尚不登途一何過乎且聖上眷遇之誠意可透金石而卿豈不感動乎卿須安心勿復控辭幡然登途

待罪臣金若魯引義書批

覽書具悉卿懇當此焦遑之時其何多諭保護重任難爲輕許卿須安心勿辭

禮曹判書元景夏辭職書批

覽書具悉賞典式遵舊例本兼之任雖有舊例不可輕許令廟堂稟處

領議政李宗城引義書批

覽書具悉卿懇大朝特諭開釋辭旨鄭重可透金石卿以世祿之臣何不念稱塞之方向者臺臣誣罔之言已入聖鑑之俯燭余雖不敏亦既知之卿須安心勿復控辭幡然登途


禮曹判書元景夏引疾乞免請周甲賀禮按例舉行書批


覽書具悉當此周甲罕有之慶乃下權停之教悶迫
之心曷有其極 大朝特教申飭之下卿何過辭從
速行公


左議政李天輔引疾乞免劄批


覽劄具悉卿懇焦迫之餘承 慈教旋寢非常之
命而駕已還矣欣幸之忱曷有其極卿其勿辭善攝


凌虛閣漫稿卷之二











稿漫關虛凌

一